

¡BOMBA!

Para evitarnos supuestos
hay que obrar con decisión:
se busca mucha inversión,
pero hay muy poco en impuestos



K'untzil

Martes 14 de julio de 2026

CAMPECHE · YUCATÁN · QUINTANA ROO · AÑO 12 · NÚMERO 2766 · www.lajornadamaya.mx



U ajmeyajilo'ob u kúuchil tu'ux ku ts'a'akal ébola tu lu'umil Congoe' tu jáawso'ob meyaj tumen ma' bo'ota'ako'obi'

lajornadamaya.mx
Oochel Reuters / archivo

Ya'abach máako'ob ku meyajo'ob ti' u noj kúuchil tu'ux ku ts'a'akal ébola tu xaman-lak'inil República Democrática del Congo tu k'a'aytajo'ob le lunes máanika' táan u huelgaob tumen ma' bo'ota'ak ti'ob u meyajo'obi', mix xan ts'a'abak ti'ob bonificaciones'.

Desde u winalil mayoe', República Democrática del Congo táan u ts'aatáantik u túmben pak'be'en k'iino'ob yaan yóok'olal le viruso', ts'o'oke' kúuchilo'ob tu'ux ku kontrolarta'al yéetel u kúuchilo'ob Prevención de Enfermedades de África tu ts'áajo'ob k'ajóoltbil le semana máaniko', u k'iinilo'ob pak'be'en k'oja'an ébola yaan walkila' leti'e' maas jach nojoch ts'o'ok u yantal te'el continenteo'.

Ichil máaxo'ob ku meyaj Hospital General de Rwampara, tu méek'tankaajil Ituri, ti' yaan epidemiólogos, máaxo'ob xak'altik le casoso'obo', conductoro'ob yéetel muknáalo'ob, leti'obe' ku ya'aliko'ob ma' bo'ota'ako'ob tumen u jo'olpóopilo'ob Congo.

U najil ts'akyaje' jk'a'al tumen máaxo'ob tu káajso'ob le huelgao', ts'o'oke' k'ala'ab xan noj bej ku k'uchul tak te'el kúuchilo'.

Yaan jaytúul ajmeyajo'ob te'el kúuchilo', beyxan uláak'o'ob tu káajsajo'ob huelga le semana máako', tumen tu ya'alajo'ob jo'opópo'obe' ma' u bo'oto'ob desde ka ka' toop' le pak'be'en k'oja'anilo'.

Tak walkila', yaan mil 926 u p'éel casos te'el noj lu'umo'; ti' le je'elo'obo' táakbesa'an 702 u túul máaxo'ob ts'o'ok u kíimil tu yóok'olal, je'el bix a'alabik tumen u jo'olpóopilo'ob Congo.

Beey túuno', máax jo'olbesik OMS, Tedros Adhanom Ghebreyesus, tu k'a'aytaj ti' X le lunes máanika', ts'o'ok u yantal uláak' juntúul estadosunidosil, juntúul humanitario jmeyaj ti' u lak'inil Congoe' máax ti' jtsa'ay ébola, yanchaj bin u biinsa'al Alemania. Yáax estadosunidosil máax ti' jpáak'e', juntúul jts'akyaj táan ka'ach u meyaj Congo ti' yáax semanasil ka káaj pak'be'en k'oja'an.